

墜二矢俱不及百步臣等之所目見而都廳皆以入格書送極為駭愕封箭官李旰依法治罪監察亦難免不能檢飭之罪請並推考舉子矢數亦不用之意敢啓 荅曰並拿推仁墜具宏之子也恃其勲戚之勢縱恣無忌如李旰武人恟於威勢何敢抗其言乎不治舉子之罪只有差備官拿推之教一時物情大為不快○癸巳備邊司啓曰南漢山城之役體城雖畢而尚多未完之處迨未霽雨欲為畢役而工匠及將士料布當初所備者已竭無餘而因御史書啓一魚一紙不得求請於外方且廣州則雖是本邑而各樣應納之物未有一事為山城減下者即今西運糧餉每結各收一斗五升而本州之米亦在於應運之中請以其米移捧山城一以補糧餉一以慰民心 從之○三公又上劄請深惟 宗社生民之計體奉 慈殿勸勉之意節抑至情以為保全之方 荅曰省劄具悉至誠劄辭予當體念焉卿等勿為過慮○以金壽賢為承政院右副承旨趙邦直為司憲府掌令○甲午夜一更二更南方有氣如火光○乙未白虹貫日辰時巳時日有重暈內暈有兩珥夜流星出北斗星下入坤方長四五尺許色赤南方有氣如火光○丙申 上下教曰金浦邑底之民今將撤家移徙予甚矜惻心甚不安令該曹限數年復戶火巢內民田亦以國屯田擇好折